

Na osnovu člana 16. stav 1. tačka 1. Zakona o zaštiti od požara i vatrogastva ("Službene novine Federacije BiH", broj 64/09 i odredbi članova 8. i 9. Zakona o nadležnosti organa vlasti Kantona Sarajevo u oblasti zaštite od požara i vatrogastva ("Službene novine Kantona Sarajevo", broj 23/11) i člana 55. Statuta Općine Ilijaš ("Službene novine Kantona Sarajevo" broj:20/09), Općinsko vijeće Ilijaš, je na svojoj 12 sjednici održanoj 31.10.2013 godine donijelo:

ODLUKU O ORGANIZOVANJU I FUNKCIONIRANJU ZAŠTITE OD POŽARA I VATROGASTVA NA PODRUČJU OPĆINE ILIJAŠ

POGLAVLJE I. Osnovne odredbe

Član 1. (Predmet Odluke)

Ovom odlukom reguliše se organizovanje i funkcioniranje zaštite od požara i vatrogastvo, način ostvarivanja prava i dužnosti građana i pravnih osoba u oblasti zaštite od požara i vatrogastvu, nadležnost organa vlasti Općine Ilijaš, planiranje i provođenje mjere zaštite od požara, programiranje i planiranje, obučavanje i osposobljavanje i finansiranje zaštite od požara i vatrogastva na području općine Ilijaš (u daljem tekstu: Općina) u skladu sa Zakonom o zaštiti od požara i vatrogastvu, Zakonom o nadležnosti organa vlasti Kantona Sarajevo u oblasti zaštite od požara i vatrogastvu, kao i odredbama ove Odluke.

Član 2. (Djelatnost od posebnog interesa)

- (1) Zaštita od požara i vatrogastvo čine sastavni dio jedinstvenog sistema zaštite i spašavanja ljudi i materijalnih dobara od prirodnih i drugih nesreća. Obuhvata skup mjera i radnji upravne, organizacijske, stručne, tehničke, obrazovne i propagandne prirode, a u cilju sprečavanja izbijanja požara i njegovog širenja, te zaštite ljudi, biljnog i životinjskog svijeta, materijalnih, kulturnih i drugih dobara i okoliša.
- (2) Zaštita od požara je djelatnost od posebnog interesa za Federaciju, Kanton, grad i općinu, koja se ostvaruje na način predviđen Zakonom o zaštiti od požara, podzakonskim propisima donesenim na osnovu tog zakona i međunarodnim tehničkim normativima i standardima koji važe u Bosni i Hercegovini.

Član 3. (Obim primjene Odluke)

Zaštitu od požara organizuju i provode pravna i fizička lica (građani), organi vlasti Općine i druge institucije koje su vlasnici ili korisnici građevina, prostora šuma, šumskog ili poljoprivrednog zemljišta i strukture civilne zaštite, koji poslove zaštite od požara obavljaju u skladu sa odredbama Zakona o zaštiti od požara, Zakona o zaštiti i ispašavanju od prirodnih i drugih nesreća, provedbenim propisima donesenim na osnovu ovih Zakona, kao i odredbama ove Odluke.

POGLAVLJE II. Način ostvarivanja prava i dužnosti građana i pravnih lica

Član 4. (Lična i uzajamna zaštita građana)

Lična i uzajamna zaštita građana znači najmasovniji oblik pripremanja i organizovanog učešća građana u zaštiti i spašavanju od požara. Požar može nastati kao posljedica određene radnje građana ili njihovog

nemara u svim sredinama i mjestima u kojim žive i rade, stoga je zakonska obaveza provođenja preventivnih mjera zaštite od požara, njihove aktivnosti na sprečavanju nastanka požara, kao i samo učešće u akcijama gašenja požara. Sve ove aktivnosti provode se kroz obuku građana.

Član 5.

(Obaveze pravnih lica)

- (1) Pravna lica, državni organi i druge institucije (u daljem tekstu: Pravna lica), dužni su svojim općim aktom, a u skladu sa vrstom djelatnosti koju obavljaju, urediti pitanje koje se odnosi na organizaciju i funkcioniranje zaštite od požara u svojim objektima i prostorima.
- (2) Vlasnik ili korisnik građevine ili prostora odgovoran je za provođenje zaštite od požara, a može ukoliko želi ovlastiti pravno lice registrirano za obavljanje poslova iz oblasti zaštite od požara koje ima odgovarajuće stručne kadrove, opremu i sredstva za vršenje tih poslova. Obavljanje poslova za njihove potrebe vrši se zaključivanjem ugovora.
- (3) U izvršavanju poslova iz stava (1) ovog člana pravna lica provode odgovarajuće pripreme, utvrđuju način organiziranja i ostvarivanja zaštite od požara, određuju zaposleno lice koje će biti zaduženo da se stara o provođenju mjere zaštite od požara utvrđenih općim aktom pravnog lica, provode stručno osposobljavanje zaposlenih lica za provođenje mjera zaštite od požara, donose svoj plan zaštite od požara i utvrđuju način njegovog provođenja, uređuju način vršenja kontrole provođenja predviđenih mjera zaštite od požara kao i sva druga pitanja vezana za provođenje mjere zaštite od požara.

POGLAVLJE III. Nadležnost općinskih tijela vlasti

Član 6.

(Nadležnost Općinskog vijeća)

U ostvarivanju prava i dužnosti u oblasti zaštite od požara, Općinsko vijeće (u daljem tekstu : Vijeće) na prijedlog općinskog načelnika:

- a) donosi odluku o organizovanju i funkcioniranju zaštite od požara i vatrogastva na području općine Ilijaš,
- b) donosi odluku o formiranju profesionalne vatrogasne jedinice općine,
- c) u okviru programa razvoja zaštite i spašavanja ljudi i materijalnih dobara od prirodnih i drugih nesreća na području općine Ilijaš (u daljem tekstu: Program razvoja), utvrđuje organizaciju i način provođenja zaštite od požara i vatrogastva,
- d) donosi Plan zaštite od požara općine Ilijaša,
- e) donosi odluku kojom se uređuje organizacija i rad dimnjačarske službe,
- f) planira i utvrđuje izvore finansiranja za izvršavanje poslova zaštite od požara i vatrogastva,
- g) vrši i druge poslove u skladu sa Zakonom o zaštiti od požara, ovom Odlukom i drugim propisima.

Član 7.

(Nadležnost općinskog načelnika)

U ostvarivanju prava i dužnosti u oblasti zaštite od požara, općinski načelnik :

- a) donosi procjenu ugroženosti od požara na području općine Ilijaš (u daljem tekstu:Procjena ugroženosti)
- b) na prijedlog Službe za zajedničke poslove donosi opći akt kojim se uređuju pitanja organizacije i funkcioniranja zaštite od požara u objektima i prostorima u vlasništvu Općine,
- c) predlaže plan zaštite od požara općine Ilijaš,
- d) predlaže način osnivanja profesionalne vatrogasne jedinice,
- e) planira finansijska sredstva u budžetu Općine potrebna za zaštitu od požara i vatrogastvo,
- f) vrši i druge poslove u skladu sa Zakonom o zaštiti od požara, ovom Odlukom i drugim propisima.

Član 8.

(Nadležnost općinskog organa uprave i drugih tijela uprave)

Službe za upravu, stručne i druge službe Općine Ilijaš (u daljem tekstu; općinski organi uprave) i druga općinska tijela uprave, u okviru svojih prava i dužnosti utvrđenih Zakonom o zaštiti od požara, Statutom Općine i drugim propisima iz oblasti zaštite od požara, dužni su :

- a) učestvuju u izradi Procjene ugroženosti, Programu razvoja i Planu zaštite od požara iz oblasti za koju su osnovani,
- b) organizuju, planiraju i osiguravaju provođenje preventivnih mjera zaštite od požara vlastitog ljudstva, materijalnih sredstava i objekata koje koriste u svom radu,
- c) u okviru svoje redovne djelatnosti izvršavaju zadatke iz oblasti zaštite od požara koji su utvrđeni zakonskim i drugim propisima,
- d) obavještavaju Službu civilne zaštite Općine o podacima koji su od značaja za planiranje, organiziranje i provođenje zaštite od požara,
- e) vrše i druge poslove iz oblasti zaštite od požara u skladu sa Zakonom, ovom Odlukom i drugim propisima.

Član 9.

(Nadležnost Službe civilne zaštite)

(1) Služba civilne zaštite iz oblasti zaštite od požara i vatrogastva vrši sljedeće poslove:

- a) poduzima odgovarajuće mjere i aktivnosti na organizaciji i provođenju zaštite od požara i vatrogastva na području općine Ilijaš,
- b) po potrebi obavlja stručne i druge poslove u vezi organiziranja profesionalne vatrogasne jedinice,
- c) izrađuje Procjenu ugroženosti od požara u suradnji sa drugim službama za upravu Općine,
- d) predlaže pitanja koje se odnose na razvoj zaštite od požara i vatrogastva u okviru Programa zaštite i spašavanja od prirodnih i drugih nesreća Općine Ilijaš u suradnji sa drugim službama za upravu Općine,
- e) izrađuje Plan zaštite od požara u suradnji s drugim službama za upravu Općine,
- f) planira i osigurava provođenje obuke i stručno osposobljavanje i obučavanje pripadnika vatrogasne jedinice i drugih lica koja se bave poslovima vatrogastva,
- g) pruža stručnu i drugu pomoć dobrovoljnim vatrogasnim društvima,
- h) u okviru operativnog centra organizuje funkcionalni dio informacionog sistema za zaštitu od požara i vatrogastva,
- i) ostvaruje saradnju sa pravnim licima u kojima su vatrogasne jedinice,
- j) ostvaruje saradnju sa službama civilne zaštite susjednih općina, kao i kantonalnom upravom civilne zaštite u pitanjima od zajedničkog interesa za zaštitu od požara i vatrogastvo,
- k) vrši druge poslove iz oblasti zaštite od požara u skladu sa Zakonom, ovom Odlukom i drugim propisima.

(2) Za vršenje poslova iz stava 1. ovog člana u Službi civilne zaštite se osniva organizacijska jedinica za zaštitu od požara i vatrogastvo.

POGLAVLJE IV. Programiranje razvoja zaštite od požara i vatrogastva

Član 10.

(Programiranje u općini)

- (1) Programiranje razvoja zaštite od požara i vatrogastva iz nadležnosti Općine vrši se u okviru Programa razvoja zaštite i spašavanja općine, a u skladu sa Procjenom ugroženosti od požara područja općine i drugih činjenica važnih za programiranje.
- (2) Programiranje razvoja zaštite od požara i vatrogastva vrši se na period od najmanje pet godina.

Član 11.
(Godišnji plan aktivnosti)

Na osnovu Programa iz člana 10. ove Odluke općinski načelnik donosi godišnji plan aktivnosti za realizaciju zadataka utvrđenih za zaštitu od požara i vatrogastva, a prema utvrđenim prioritetima.

POGLAVLJE V. Organizacija i funkcioniranje, planiranje i provođenje mjera zaštite od požara i vatrogastva, stručno osposobljavanje i usavršavanje

Član 12.
(Nosioци organizacije i provođenja zaštite od požara)

- (1) Osnovni nosilac organiziranja i provođenja zaštite od požara su općina i grad kao jedinice lokalne samouprave,
- (2) Organizacija i funkcioniranje zaštite od požara u općini utvrđuje se u Planu zaštite od požara Općine koji donosi Vijeće na prijedlog općinskog načelnika. Plan zaštite od požara izrađuje se na osnovu Procjene ugroženosti od požara područja općine.

Član 13.
(Plan zaštite od požara)

- (1) U cilju praćenja izvršenja Plana zaštite od požara općine, Vijeće svake godine do kraja februara razmatra i ocjenjuje njegovu realizaciju i vrši odgovarajuće izmjene u skladu sa novonastalim promjenama i članom 22. Zakona o zaštiti od požara,
- (2) Plan zaštite od požara izrađuje državni organi i druge institucije i pravna lica za vlastite potrebe, koji se odrede u Planu zaštite od požara općine.

Član 14.
(Planiranje i provođenje mjera zaštite od požara)

Planiranje i provođenje mjera zaštite od požara osigurava se pri izradi dokumenata prostornog uređenja i vrši u skladu sa članovima 27. do 55. Zakona o zaštiti požara.

Član 15.
(Vatrogasna djelatnost)

- (1) Vatrogastvo je obavezna javna služba čija je osnovna djelatnost zaštita i spašavanje ljudi i materijalnih dobara od požara,
- (2) Vatrogasna djelatnost obuhvata aktivnost na gašenju požara i spašavanju ljudi i materijalnih dobara ugroženih požarom i eksplozijom, pružanju tehničke pomoći u nezgodama, učešće u provođenju preventivnih mjera zaštite od požara i eksplozija i drugih poslova vezanih za zaštitu i gašenje požara,
- (3) Vatrogasnu djelatnost obavljaju vatrogasne jedinice, vatrogasna društva i vatrogasni savezi.

Član 16.
(Struktura vatrogasnih snaga)

- (1) U skladu sa Procjenom ugroženosti od požara općine, kadrovski materijalnim i drugim uslovima utvrđuje se struktura vatrogasnih snaga. Osnovne snage za obavljanje vatrogasne djelatnosti su:
 - a) profesionalne vatrogasne jedinice, koje osniva kanton i općina,
 - b) dobrovoljne vatrogasne jedinice koje osnivaju dobrovoljna vatrogasna društva i vatrogasne jedinice pravnih lica, koje predstavljaju dopunske snage za vatrogastvo,
 - c) jedinice i povjerenici civilne zaštite, službe zaštite i spašavanja, organi uprave civilne zaštite i štabovi civilne zaštite,
 - d) operativni centri civilne zaštite koji osiguravaju komunikacijsko-informacijsku podršku štabovima civilne zaštite i drugim organima, koji rukovode akcijama zaštite na području ugroženom od požara.

- (2) Profesionalnu vatrogasnu jedinicu čine vatrogasci koji se nalaze u radnom odnosu u organima uprave civilne zaštite u skladu sa Zakonom o zaštiti od požara.

Član 17.

(Osnivanje profesionalnih vatrogasnih jedinica)

- (1) Glavne snage u gašenju požara i spašavanju ljudi i materijalnih dobara ugroženih požarom su profesionalne vatrogasne jedinice, koje obavezno osnivaju općina, grad i Kanton,
- (2) Svaka općina je dužna formirati vlastitu profesionalnu vatrogasnu jedinicu ili ispostavu zajedničke profesionalne vatrogasne jedinice kantona na području,
- (3) Vatrogasne jedinice se osnivaju aktom o osnivanju jedinice.

Član 18.

(Sporazum o osnivanju zajedničke profesionalne vatrogasne jedinice)

- (1) Zajednička profesionalna vatrogasna jedinica osniva se sporazumom koji zaključuje Vlada kantona i općinski načelnik.
- (2) U sporazumu iz stava (1) utvrđuje se: veličina jedinice, razmještaj ispostava te jedinice sa dovoljnim brojem vatrogasaca utvrđenih procjenom ugroženosti, način popune ljudstvom, opremom i tehničkim sredstvima, način upotrebe jedinice, komandovanje, međusobne obaveze, način finansiranja i druga pitanja neophodna za rad jedinice.
- (3) Općinsko vijeće daje saglasnost na sporazum iz stava (1) ovog člana.

Član 19.

(Dobrovoljna vatrogasna društva)

Dobrovoljna vatrogasna društva u okviru svoje djelatnosti u oblasti zaštite od požara rade u skladu sa članovima 81.do 85. Zakona o zaštiti od požara.

Član 20.

(Vatrogasne jedinice pravnih lica)

- (1) Obavezu osnivanja vatrogasne jedinice naročito imaju pravna lica u kojima se proizvode, prerađuju, distribuiraju ili skladište zapaljive, eksplozivne i ostale opasne materije,
- (2) Pravna lica iz stava (1) određuju se u Planu zaštite od požara općine.

Član 21.

(Stručno osposobljavanje i usavršavanje)

Stručno osposobljavanje i usavršavanje svih učesnika na zaštiti od požara i vatrogastvu vrši se u skladu sa članom 128. do 130. Zakona o zaštiti od požara.

Član 22.

(Izvori finansiranja)

Vatrogasna djelatnost predviđena Zakonom o zaštiti od požara finansira se iz :

- a) budžeta kantona i općine,
- b) sredstava pravnih lica i vatrogasnih društava,
- c) premija osiguranja,
- d) dobrovoljnih priloga ili poklona pravnih i fizičkih lica,
- e) međunarodne pomoći,
- f) drugih izvora utvrđenih Zakonom o zaštiti od požara i drugim propisima.

Član 23.
(Budžetska sredstva)

Sredstva potrebna za finansiranje vatrogasne djelatnosti općine iz člana 136. Zakona o zaštiti od požara obezbjeđuje se svake godine u općinskom budžetu.

Član 24.
(Finansijska sredstva u pravnim licima)

- (1) Finansijska sredstva potrebna za organiziranje, provođenje i unapređenje zaštite od požara, obučavanje i osposobljavanje zaposlenih lica, osiguravaju pravna lica, državni organi i druge institucije za svoje građevine, prostore i zaposlena lica.
- (2) Sredstva iz stava (1) planiraju se svake godine u okviru finansijskog plana za obavljanje svoje redovne djelatnosti.

Član 25.
(Finansiranje dobrovoljnih vatrogasnih jedinica)

Dobrovoljna vatrogasna društva finansiraju se iz sredstava osnivača društva, donacija i drugih vrsta pomoći, sredstava iz budžeta općine.

POGLAVLJE VI. Prelazne i završne odredbe

Član 26.
(Organizovanje postojećih vatrogasnih jedinica)

- (1) Postojeće vatrogasne jedinice organizirat će se u skladu sa članom 170. Zakona o zaštiti od požara.
- (2) Poslove iz stava (1) ovog člana planira i osigurava njihovo izvršenje općinski načelnik.

Član 27.
(Obaveza organa civilne zaštite)

- (1) Nadležni Općinski organ uprave dužan je dopuniti pravilnik o unutrašnjoj organizaciji i u njemu utvrditi radna mjesta za vršenje poslova zaštite od požara i vatrogastva, a u skladu sa članom 171. Zakon o zaštiti od požara.
- (2) Izvršenje poslova iz stava (1) ovog člana osigurava općinski načelnik.

Član 28.
(Ravnopravnost spolova)

Gramatička terminologija u ovoj Odluci podrazumjeva uključivanje oba spola.

Član 29.
(Stupanje na snagu)

Ova Odluka stupa na snagu osmog dana od dana objavljivanja u "Službenim novinama Kantona Sarajevo".

Broj: 01/1-02-1895-11/13

Ilijaš 31.10.2013 godine

Predsjedavajući
Općinskog vijeća Ilijaš ;

Damir Filipović